

اوده مشلي مرحوم
ضيا صونغور اوغلى نك
نوطلرى

بسم الله الرحمن الرحيم

سواقط فاتحه

استعيذ بالله ﴿الحمد لله رب العالمين﴾ (*)

فاتحهء شريفه ده يدي حرف يوقدر . اگر سورهء فاتحه ده بو يدي حرف موجود اولسه ايدي هيچ بر كافر مسلمانه قارشى گله مزدى . بتون كافر لر ، منافق لر و مرتدلر همان هلاك اولور لر و هپسى فجيع بر صورته يره سرييلر لردى . " سواقط فاتحه " ديه تعبير اديلن بو حرفلرى طويلى حالده گوسترن رموز (فَجَشِ ثُرْ خَطْ) كلمه لريدر .

رحمن و رحيم صفتلرى

استعيذ بالله ﴿الرحمن الرحيم﴾

جناب حَقِّكَ (رحمن) اسم شريفى اولمه سه ايدي ، بو دنيا ده

(*) ان جبريل قال للنبي عليه السلام: يا محمد كنتُ أخشى العذاب على امتك فلما نزلتُ الفاتحةُ امنتُ قال لم يا جبريل قال لان الله تعالى قال ﴿وَإِنَّ جَهَنَّمَ لَمَوْعِدُهُمْ أَجْمَعِينَ لَهَا سَبْعَةُ أَبْوَابٍ لِكُلِّ بَابٍ مِنْهُمْ جُزْءٌ مَّقْسُومٌ﴾ سورة الحجر - ٤٣ ، ٤٤ - و اياتها سبع فمن قرأها صارت كل آية طبقاً على باب من ابواب جهنم فتمر امتك عليها

هیچ بر کافر نَفَس الاماز و الدیغی نفسی طیشاریه ویره مزدی .
(رحمن) دنیایه ، (رحیم) ایسه آخرته عائددر .

دنیایه عائد اولان اسمنک آخرته عائد اولان اسمندن بر
حرف فضله اولماسی ، بو عالمده دائرهء هدایتک خارجنده یشایان
کافرلره ، منافقره ومرتدلره ده احسانک یاپیلدیغینی گوسترر .
حضرت الله (رحمن) اسم شریفینک اسرارینی بو دنیاده بتون
موجو داته قویه رق ، مخلوقاتی آنکله اداره ایتمکته در . مثلاً :
ده وه یاورولایینجه یاوروسینه باصوب آزمیور . و فیل
یاتامادیغی ایچون صویه گیروب اوراده یاورولویور . صویه
دوشر دوشمز ده همان اونی آلیور .

(رحیم) اسم شریفنک (رحمن) اسم شریفیندن بر حرف
نقصان اولماسی دخی آخرته جناب حقک احسان و اکرامینک
یالکز اهل هدایته مخصوص اولدیغینی ، کفارک ایسه رحمت
الهیة دن ابدیا محروم اولاجاغینی کوسترمکده در . چونکه
کافرلر فی الحقیقه (عبدالله) دگلدلرلر . اونلرک اسم جلاله
اضافتی ، اضافت خلقدر . یوقسه مؤمنلرده اولدیغی گبی اضافت
تشریف دگلدلر .

اسباب هدایت دورتدر

﴿إهدنا الصراط المستقیم﴾

هدایت ایکیدر . بری ، طوغری یولو گوستر مک ، دیگرى
هدایتى خلق اتمک . تصوفه گوره هدایتک معناسى : موجود اولان
هدایتى هر آن و هر لحظه زیاده لشرمکدر . اسباب هدایت دخى
دورتدر :

۱- جناب حقک وجود بشره بخش ایتمش اولدیغى فطرت و
استعدادات .

۲- حق و صواب ایله باطل و کاذب آراسنى تفریق اتمک .

۳- جناب حقک گوندرمش اولدیغى رسوللر و سماوی
کتابلر .

۴- بتون لطائفه فتوحات الهیه نک احسان ایدیلمه سى .
هدایتک مرتبه اعلى سى بودر . اهل اللهک حالى گبى .

اهل الله ایله اولمق

الحديث : ﴿ جالسوا الكبراء و سائلوا العلماء و خالطوا
الحکماء ﴾ رواه الطبرانى

علما بر طاقم علومى بلیرلر . احکام ظاهره بى صور گچ .
حکما ایله گورشمک محل امنیتدر . لکن بو ، شبهه سز
آوروپانک یالانجى حکماسى دگل ؛ اسلامک حکمت شناسلریله

کوزشمکدر . کبرا ايله مصاحبه يعنى اهل الله ايله هر داءم برابر اولمق ، انسانی عظیم اسرار الهی ايله شرفیاب قیلار .

علم نرده در؟

استعیند بالله ﴿اسجدوا لادم فسجدوا الا ابليس﴾ (سورة البقر / ۳۴)

ظاهريلرك علمی عقلده در . حالبوکه علم اولا روحه اينر . اورادان قلبه گچر . عقل واسطه سی ايله بتون وجوده سرايت ايدر . عقل روحك ترجمانيدر . ترجمان هيچ بر زمان فاعل اولاماز . حاکم ده اولاماز . چونکه عقل علمی يوکسستمک ايچون بر آلتدر . نه يازيق که بعض انسانلر اصل دورورکن آلتی آدم اتمگه چالیشیورلر . و علمی ، ترجمان اولان عقله اوگرتیورلر . حال بوکه ترجمانده ایش یوقدر . عقل بو منبعلردن حواسه چيقار . چونکه نفس عاجز بر آلتدر . عقل ایسه عبودیت ایچون وريلمشدر ، ربوبیت ایچون دگل ؛ آی ملامیلر ، قیزیلباشلار! ديه جواب وریرسگز .

ابلیسک علمی ظاهری ایدی . جتی گوردیگی و ملائکه یاننده بولوندیگی حالده ، علمی قلبینه اینمه دیگی ایچون

﴿اسجدوا لآدم﴾ آیتنده که سری آگلایامادی (*) و بوراده آیاغی قایدی . چونکه اونک علمی غرتلاغندن آشاغییه گچمه مش ، یالکز قفاسنده قالمشدی .

(ایکی سنه اولسیدی)

قال الامام ابو حنیفة رحمه الله (لَوْلَا اَلْسِتَّانُ لَهَلَّكَ اَلنَّعْمَانُ) امام اعظم ابو حنیفه حضرتلری وفاتی زماننده " معنویاته انتساب ایدوب مرشد کامله باغلی اولارق گچیردیگم ایکی سنه اولمه سه ایدی ، شبهه سز نعمان هلاک اولمشدی ، " بویور- مشدر . معنویاتی انکار ایدنلره بونی خطیر لاتمالی

دین معنویاتسز محافظه ایدیله مز

ماجارستان وقتیله مسلمانندی . فقط بر گون گلدی که اوراده یالکز ظاهری علما قالدی . ظاهری علما معنویاتدن محروم اولدیغی ایچون دنگه بی تارتامادی . و ایشه گوردیگکز گبی خرستیان اولوب گتدیله . بو دین معنویاتسز محافظه ایدیله مز .

نوط : بز جويزك ایچینی یرز . ظاهریلر قابوغی ایله اوغراشیر . آرامزده که فرق بودر .

(*) ان آدم مسجود الملائكة مع ان السجدة للخالق جل سلطانه . لالمخلوقه و مصنوعه ای مخلوق کان (مکتوبات شریفه ، مکتوب : ۲۵۴)

صقنتی آنده اوقورلردی

ادرك ابا العباس انی منحصر * سیدی بلیا ابن ملکان الخضر
افندی حضرتلری بو ایکی بیتی درس آراسنده زمان زمان
اوقورلردی. "بلیا" خضر علیه السلامک آدی، "ملکان"
باباسنک آدیدر. کونیه سی ایسه، "ابو العباس" در. "انی
منحصر" بن صقنتیدایم، دیمکدر.

آب حیات وحضر علیه السلام

یر یوزونده "آب حیات" تعبیر ایدیلن حیات صویو واردر.
او سودان ایچن کمسه قیامته قدر حیاتده قالور. خضر علیه
السلام اوندن ایچمشدر. هر یوز سنه ده ۱۸ یاشینه اینر. آنک
بو دنیاده قالمه سنه سورة فاتحه سبب اولدی. خضر علیه السلام
بر فتح کبری ایله فاتحه شریفه نک عرش اعلی ده نوردن بر
دائرة شکلنده کی کتابه سنی کورونجه حیران اولوب اونه عاشق
اولدی. و فاتحه شریفه نک انوار واسرارینی کنديسینه احسان
اتمه سی ایچون جناب حقه التجا ایدوب یالواردی. جناب حق
ده دعاسینی قبول ایده رک اونى امت محمدیه داخل ایله دی. او
شمدی آرامزده یاشیور و دها چوق یاشایا جاقدر.

آیاصوفیاده اختیار بر صقاللی واردی. بو ذات عین
زمانده خضر علیه السلامک دوستی ایدی. بر گون او اختیاره

دیدیمکه :

- " نصل ، خضر علیه السلام انسانلرک بو گیدیشاتنه نه دیور ؟ " او صورموش . خضر علیه السلام ده :

- " انسانلرک عصیانندن چوق آغر یورغونلوق آجیسی حس ایدیوروز ، " دیمش .

« یوزده اونه راضیم »

اولادلرم ، بن یوزده اونه راضیم . هر یوز طلبه دن اون تانه سی اوقیوب عالم اولسون ؛ دها صوگره بو دین مبین اسلامک احیا حذمتنه طالب اولسون یتر . لکن دقت ایدیک ! انبیاء میراثی اولان بو علمک فیضی رابطه ایله در . رابطه سز اوقونان علملر معنوی مرضلری تداوی ایده مز . چونکه ظاهری علمله اکتفا ایدنلر منفعته آلت اولورلر . اونک ایچون بو یولده ضایعات ، حساب ایدیلدیگندن هپ فضلله اولیور .

سویلدکلریزی تطبیق ایدک

اولادلرم ، استانبول واعظلرندن علی حیدر بر گون وعظدن صگره بگا دیدیکه : " نصل ، کوزل وعظ ایتدیم می ؟ " بن ده اوگا : " سنک شو وعظک کیراز ایلک چیقدیغی زمان کیرازلری قوری بر دگنکک اطرافنه صیرا صیرا باغلابوب صاتماغه بگزر . اونلر ، او کیرازلری بشقه یشل آغاجلاردن طوپلامشدر . سن ده

بو سوزلری بشقه سندن دويدون که سويليورسون . يشيل بر
آغاج اول ده ميوه يی کنديک وير ، " ده ديم .

اولادلرم ، سز ده اوگرندکلريگیزی سويله مکله قالمایوب
کندگزرر يشيل آغاج اولماغه جاليشک . سوزلريگزی ده
وجوديگزه تطبيق ايدیک

معنوی سوينچ

استعید بالله ﴿تَنْزَلُ عَلَيْهِمُ الْمَلَائِكَةُ﴾ (سورة الفصلت / ۳۰)

بو مزده ، مؤملرك قلبنه فيوضات الهیه کلمکله انسانک ايچنده
دويدوغی معنوی بر سوينچدر . حتی نماز قيلارکن بعضا بر
فرحلق ميدانه کلير . ايسته بو فرحلق مزده ايدن ملاءکه دندر .
مؤملرك ده رجه لری يوكسلدکجه هم حفظه ملکلی هم ده بو
آیتده بيان ايدیلن مزده ملکلی طرفندن کیجه کوندوز مزده
لنیرلر . کافرلری ده حفظه ملائکه سی اداره ايدر . فقط اونلرك
بو صنف مزده ملائکه سی يوقدر .

اکر بر کمسه مسلمان اولدیغی حلدده قلبنده بویله بر فرحلق
دويميورسه ملائکه نك مزده ده بر قصوری يوقدر . لکن قاصر
اولان محل ادراك ، اوده انسانک قلبيدر . نتکم رسول الله
افندیمز :

﴿ لا تدخل الملائكة بيتا فيه كلب ﴾ بیورمشلردر . نصل که ایچنده کلب بولونان بر اوه ملک گیرمیورسه ، ایچنده ابلیسک وسوسه سی بولنان قلب اوینه ده ملائکه کیرمز . بو سبیدن بو کبی قلبره هیج بر صورتده مزده واقع اولماز .

وجودمیزده وظیفه لی ملکلر

انسانک وجودنده " ۳۸۴ " عدد خادم ، موظف ملائکه واردر . اون آلتیسی حفظه در . ایکیسی انسانک صاغ و صول طرفنده کاتبدر . دیگر ایکیسی انسانی دفع حاجت یاپدرمقله مأموردر . تمامی " ۲۰ " ایدر . " ۳۶۴ " تانه سی ایسه ، وجود انسانده بولنان " ۳۶۴ " مفصل کمیگنی طوتمقله مأمورلردر . بو ملائکه دن بر تانه سی بیراقدیمی او مفصل طوتماز اولور . بو گون اونه فلج دیورلر . دفع حاجت ملکلری او ایشی تنزلا قبول اتدکلری ایچون درجه لری دیگر لرندن افضل اولمشدر . بو سبیدن دفع حاجتدن صوگره :

﴿ الحمد لله الذي أذهب عنا الأذى و عافاني من ذلك ﴾ (رواه النسائی و ابن ماجه) ديه دعا اتمك لازمدر . بو گارعايت ایدنلر بر چوق خسته لقدن بری اولورلر . حتی پوروسطات خسته لیغی ندر بلمزلر . ذاتا اکثری خسته لقلر ، رسول الله افندمترك حدیث شریف لرنه گوره حرکت ایدیلمدیگی ایچون میدانه کلمکده در . سزله ، بونی یازک ، ازرله یك و بربریگزه سویله یك .

چپلاق خلايه گرمك وياتمق

بر كمسه چپلاق اولارق خلايه گيررسه، ويا چپلاق اولارق ياتارسه او اودن برکت قالقار و اوراده خيردن اثر قالماز.

تيممه كه دگر فرض

تيممه يوزيگي چيقارمق فرضدر. چونكه تيمم ابدستك خلفيدر. اگر ألى طوپراغه وورد يغي زمان يوزيگك آلتنه طوپراق دگمزه تيمم اولماز. و پارمقلرده خلالله جكدر.

۳۶. اخلاق حميده

الحديث: ﴿أَنَّ لِلَّهِ تَعَالَى ثَلَاثَةَ أَسْمَاءَ وَسِتِينَ خُلُقًا مَنْ لَقِيَهِ بِخُلُقٍ مِنْهَا مَعَ التَّوْحِيدِ دَخَلَ الْجَنَّةَ قَالَ أَبُو بَكْرٍ رَضِيَ اللَّهُ عَنْهُ هَلْ فِيَّ مِنْهَا يَا رَسُولَ اللَّهِ قَالَ كُلُّهَا فَيَكُ يَا أَبَا بَكْرٍ وَاحِبَهَا إِلَى اللَّهِ السَّخَاءُ﴾ (تفسير روح البيان)

اللهك "۳۶۰" اخلاقى واردر. بونلردن برى توحيد ايله بولونان بر كمسه جنته گرر. بونك اوزرينه حضرت ابو بكر رضى الله عنه: يا رسول الله بونلردن بنده هيچ وارميدر دينجه رسول الله افندمز: يا ابا بكر، انلريك هپسى سنده موجوددر. انلريك ايچنده اللهه اك سويملى اولانى ده جومرتلكدر، بويورديلر.

طریقت نقشبندیہ نك اگ گوزل خصلتی

طریقت جلیلهء صدیقهء نقشبندیہ نك اك گوزل خصلتلرندن
بری ده باشقه لرینك منفعتنی كندی منفعتلندن اوستون تومتقدر .
امام ربانی اولادلاری هپ شویله دوشنور : " بو دنیا ده هر كس
مسلمان اولصون ، عالم اولصون و زنگین اولصون . حیاتی
عبادت ، طاعت ایچنده گچیره رك طریق جتتی بولصون . بز ده
بو یولوك خادملری اولالم ، یتیر " دیرلر . بو نه كوزل بر
خصلت عظیمه در . چونكه أهل رابطه ده صفات الهیه دن جمال
صفتی غالبدر . اونك ایچون ضلالتده اولانلرك هلاكنی دگل ،
هدایتنی ایسترلر . أهل كفرک و أهل ضلالتك هلاك اولوب
جهنمه کیرمه سنده فائده یوقدر . نتکم جناب حق بتون أنبیاء
مرسلینی انسانلرك هدایتی ایچون کوندرمشدر . هلاکی ایچون
دگل .

مشایخن بعضلری :

(أَللر یخشی بز یمان * أَللر بغدای بز صمان) دیرلر .

رحمت الهی ؛ ذاته ، غضب ؛ صفته باغلیدر

استعیذ بالله ﴿ کتب علی نفسه الرحمة ﴾ {سورة الانعام / ۱۲}

حضرت مولا رحمتنی ذاته یازمش و رحمت الهیه یی ذات
أقدسنه باغلامشدر . غضب ایسه صفات الهیه یه باغلیدر . ذاته

عائد اولان رحمت ، صفاتنه عائد اولان غضبه غالبدر . رحمت الهیه نك ظهوری دخی غضب الهیدن ایلریده در . نتکم بتون موجوداتك خلق وایجادی ، رحمت الهیه نك اثریدر . غضب الهی نك مخلوقاته تعلقی ایسه قوللرك عصیانی ایله میدانه کلن بر ظهورات لاحقه در . ﴿ان رحمتی سبقت علی غضبی﴾ حدیث قدسیسینك معناسی ده بودر .

شاه نقشبندك بر مناجاتی

شاه الكل محمد بهاء الدین نقشبند " قدس سره " حضرتلری مناجاتنده دیمشدرکه :

" خلقتنی مجاناً ورزقتنی مجاناً فاغفرلی مجاناً "

بزده بوگا علاوه درزکه : " وشرّفنا بجمالک مجاناً "

پیغمبر افندیمیزك ثبات و جسارتی

رسول الله افندیمز خنین غزوه سنده بش بیک کشیلک دوشمانك قارشوسنده یالگز قالنجه :

" اناالنبی لا کذب انا ابن عبد المطلب " دیه اعلان نبوت ایتدیلر .

روحانیلرك جهنمه آقانلر ایچون فریادی

شو بوغازك صولاری نصل آقیورسه ، انسانلرده جهنمه

• دوغری اویله آقوپ کیدیور . بو وضعیتی گورن روحانیلر
﴿ يَا رَسُولَ اللَّهِ تَعَالَى نُخْلِصُ عِبَادَ اللَّهِ ﴾ دیه جاغیر شیورلر .

آفات و بلالرك سببی

استعید بالله ﴿ لِيَذِيقَهُمْ بَعْضَ الَّذِي عَمَلُوا ﴾ (سورة الروم / ۴۱)

آفات و بلیه لرك ظهور ایتدیگی مملکتلرده اسم حکیم ایچون حکمت الهیه ، عبادالله ایچون دخی مصلحت عظیمه واردر . چونکه آفاتك ظهوری اطاعته دعوت حکمتنه باغلیدر . جناب حق استعدادینی غیب ایدن قوللرینی اطاعته رجوع ایتسونلر دیه بر طاقم آفات و بلیه لر ایله ایقاظ ایدر . اونلری ایقاظ ایچون ایشله دکلری معاصیدن بعضیسنك آجیسنی بو دنیاده کندیلرینه طاتدیرر . مثلاً صوك اولارق سبریاده میدانه گلن زلزله ، ترکستان و دیگر یرلرده جریان ایدن سورگون وقعه لری گبی بعضی مشقت و زورلقلرله الله تعالی قابل هدایت اولان کمسه لری ایقاظ ایدیور . فانی حبسخانه قورقوسندن ، باقی حبسخانه بی اونودوپ انحراف ایتدکلری ایچون قابل خطاب اولان یرلرده قدرتنی کوستره رك اوراداکی انسانلری اویارییور . نتکم ﴿ لا اله الا الله الملك الجبار ﴾ ده که اسم جبارك اسراری بودر . یعنی هدایتیه استعدادی اولان قوللرینی زور قوللانارق اطاعته کوتورر ، دیمکدر .

یا جوج و ماجوج

یا جوج و ماجوج الله تعالی حضرت لرینه عاصی اولان
دیمکدر .

دیش آغریسی گرمه مک ایچون

صلات و ترک برنجی رکعتنده سورء فاتحه دن صکره ﴿الم
نشرح لك﴾ ایکنجی رکعتنده (تبت) ، اوچنجی رکعتنده
(اخلاص شریف) سورہ لرینی اوقویان کمسه نک دیشلری
صاغلام و صحتلی اولور . دیش آغریسی نه در بیلمز .

سجده تلاوت آیتلرینک أسراری

سجده تلاوت آیتلری اون دورت دور . قرآن کریمک نور و
فیوضاتنک أك مکمل تجلی یرلری بو اون دورت سجده آیتیدر .
نصل که آیک اون دوردنده آی گرنشله قارشى قارشیه گلوپ تام
بر ضیا آلیورسه ، انسان کامل ده بو سجده یرلرنده نور الهی نک
تجلیسنه مکمل بر شکلده مظهر اولور . فیوضات الهیه یه نائلیتده
مرتبه کماله اولاشیر .

حقیقت کعبه صورت رسولدنافضلدر

بر حقیقت رسول ، برده صورت رسول واردر . حقیقت
کعبه ، صورت رسولدن افضلدر . امام ربانی احمد فاروقی

حضرتلری بونی بویله ایضاح ایدنجه ، بتون عالمر طوپلانوپ :
- " نصل اولور أفندم؟ هیچ کعبه رسول اللهدن افضل
اولورمی ؟ " دیمشدر . امام ربانی حضرتلری ده جوابا
بیورمشدرکه :

- " حقیقت کعبه ، مسجودله اولان ذات الهی در . حقیقت
رسول ایسه جناب حقم ذاتنک صفاتنک و جمالنک نوریدر .
آلبته نورندن ذاتی ده افضلدر . "

عالی علوم سفلیاته آلت ایدلر

امام اعظم ابو حنیفه حضرتلری بر گون طلبه لريله گیدرکن
حقبازک بری خلقه حوقبازلوق نوماره لری گوستریورمش . امام
اعظم حضرتلری طلبه لرینه دوغوش ده مشکه :

- " اولادلرم ، بو کمسه سفلی بریدر . سفلی مسلگنی سفلی
دنیايه آلت ایدیور . بنم سیزه اوگرتدیگم علم ایسه علویدر . سنز
بو علوی علمی دنیايه آله اده جک اولرسگز بو حقبازدن ده .
سفلی اولورسگز . "

سیغورته مسئله سی

بالجمله منقول و غیر منقول اموالک سیغورته سی جائزدر .
لکن حیات سیغورته سی حضرت مولایه قارشی یاقیشق

سزلقدر . حیاتی سیغورته ایتمک : " یاری! بن سنک وردیگک
بو حیاتی صاتیورم ، " معناسنه گلیر .

توتون زراعتی

زیارته کلن بر مسافره صوردیلمر : " صاحب اولدیغک یرلره
توتندن بشقه بر زراعت ایتمک ایداره گی چیقارایلورمسک ؟ "
مسافر : فوق العاده ، دیدی . بونک اوزرینه بیوردیلرکه :
" اویله ایسه بو گوندن صگره سگا توتون زراعتی یایمق یوق .
زیرا توتون هم عبادتدن هم ده استراحتدن آلیقور . "

(ظلم) و (جهول)ک تفسیری

استعیذ بالله ﴿ اِنَّهٗ كَانَ ظَلُوْمًا جَهُوْلًا ﴾ (الا حزاب / ۷۲)

بوراده کی " ظلوم " دن مراد : او کمسه کندی نفسنه قارشی
ظالمدر . آچ دورر ، عبادت ایدر . یعنی گوندوزلری اوروچ
طوتار ، گیجه لری ذکر وتهجدله مشغول اولور . نفسانی
آرزولره تابع اولمایوپ نفسنه هر دائم ظلم ایدر ، دیمکدر .
" جهول " ایسه : معنوی رابطه سنده حضرت مولانک نوری
ایله آشیلانمش ، اوگا باغلانمش ، جناب حقدن و آخرتدن بشقه
برشی دوشنمیور ، دنیوی و نفسانی آرزولردن جاهل ، اونلرک
یوللرینی بلمز ، نصل اولاجاغندن خبرسز ، دیمکدر .

عقل ملکی و عقل نفسانی

عقل ایکیدر .

۱- عقل ملکی : لطائفده بولنور که ماده ایله علاقه سی یوقدر . فیض ایله تربیه اولدیغی ایچون بتون اعضایه حاکم اولور .

۲- عقل نفسانی که نفس و شیطانہ باغلیدر . اونلر اوگا یاردیم ایدرلر . اگر بو طرفی غالب کلیرسه بتون اعضایه او حاکم اولور . عقل بر آلت اولوب قوته تابع اولور . یا نفسه باغلیدر ، یاده روحه . هانگیسی قوتلی ایسه اونک امرنده چالیشر .

ذکر قلبی و رابطه عقلی زیاده لشرر

عقلک زیاده لشمه سی ایچون ذکر قلبی و رابطه یه دوام لازمدر . وجود بیومکله عقل ده بیور . بر آدامک عقلی صبی یه ویرلمش اولسه ، صبینک "عقل قانطاری" اونی چکه مز .

قلبه گلن واردات

قلبه گلن واردات دورت دورلیدر .

۱- واردات الهی : بالواسطه اولور ، بلا واسطه اولور

۲- واردات روحانی : ملکلردن و روحانیلردن گلن الهامدر

- ۳- واردات نفسانی : نفسك احداث ایتمش اولدیغی معنالردر .
۴- واردات شیطانی : شیطانك اغواسی و تسویلاتیدر . صوك
ایکیسندن قورتولمانك بر تك یولی واردر . اوده ، رابطه یه و ذکر
قلبی یه دوام ایتمکدر .

نا أهله علم اوگرتمک

رابطه یه اهل اولیانلره علم اوگرتمک حرامینك آینه قیلچ
ویرمک گبیدر . فیوضات الهیدن محروم اولدقلرندن
اوگرندکلری علمی دنیا منفعتنه آلت ایدرلر .

عالمده هر شی رابطه یپار

بر عالمده موجود اولان بتون اشیا هر گون رابطه یپار . مثلا
صو ، آتش ، طوپراق ، نبات و أشجار گبی جمله موجودات
رابطه ایله نورینی گونشدن آلیر . دنیا گونشه رابطه یپار . گونش
عرش اعلا یه ، عرش اعلا ده نورینی جناب حقدن آلیر . اگر
دنیا رابطه یپامامش اولسه ایچنده کیلر یشایاماز . چونکه نور
اولماینجه نباتات یتشمز و آغاجلر میوه دار اولماز . آی و سماده
کی دیگر ییلدیزلر دخی گونشه رابطه یپارق نوری اوندان آلیرلر .

خرمانك انسانه مشابتهتی

استعید بالله ﴿وَجَعَلْنَا فِيهَا جَنَّاتٍ مِنْ نَخِيلٍ وَأَعْنَابٍ﴾ (یس / ۳۴)
بو آیت جلیله ده " نخیل " دیه خورما نك ذکر ایدیلمش

اولماسی ، محقق اونده که منفعتك عظمتندندر . چونکه کرهء
أرضه حضرت آدمك طوپراغنك بقیه سندن ابتدا خلق اولنان
شی خورمادر . نتکم رسول الله صلی الله علیه وسلم افندیمز :
﴿ اَكْرَمُوا عَمَّتِكُمُ النَّخْلَةَ فَانَهَا خُلِقَتْ مِنْ بَقِيَّةِ طِينَةِ آدَمَ ﴾
بیورمشلردر . (مکتوبات شریفه ، جلد : ۳ صحیفه : ۱۴۴)
خورماده بر چوق انسانى مزیت موجوددر . اونك انسانه
مشابهتی واردر . مشابهتک بر دلیلی ده باشی کسلیسه قورور .
نصل که انسانك باشی کسلیسه یشایامازسه اوده یشایاماز .
خورما وه اوزومده هپگزك بیلدیگی گبی عظیم خاصه لر
واردر . بالخاصه چوجوقلر بسمله ایله یگرمی بر عدد
چکیردکسز اوزوم یسه لر ذکالری آرتار .

عناصر أربعه

(عناصر اربعه) ای الضد الذى اجتمع فى تركيب الانسان .
بدن انسان جزؤ ترابی و عناصر اربعه دن میدانه گلمشدر .
برینجیسی " آتش ، " ایکنینجیسی " هوا " ،
اوچونجیسی " صو " ، دوردونجیسی " طوپراق " در . جهل
عناصردن گلیر . عناصره باغلی قالبون اوندن صیریلایمان
کمسه جهالتدن قورتولاماز . بتون عناصردن تجرد ایده رك سر
احدیته باغلانان انسانك فیض آلوب أخذ علم یاپماسی چوق
قولای و اسهلدر .